

ICS ta honra personanan di Caribe cu ta resalta den comunidad Mericano

Instituto prestigioso na Washington DC cu reconocimiento special pa Dr. Edward Cheung awe

ORANJESTAD/Washington DC—Institute of Caribbean Studies, ICS awe ta honra e científico Arubiano, Dr. Edward Cheung cu e Caribbean American Heritage Award durante un anochi di gala na Washington DC. ICS ta un organizacion estableci na 1993, dedica na educacion, promocion, y accion riba asuntunan cu ta impacta Mericanonan Caribense. E proposito di ICS ta pa provee un plataforma pa sector publico y priva, ademas di ngos y academico pa hiba dialogo y asisti den ehecucion di accion cu ta resultado di e dialogo.

For di su prome salida, ICS a tuma e resto pa pone atencion na topiconan cu ta di suma importancia pa e comunidad di como 10 mion persona di Caribe cu ta biba na Merca. E institucion ta representa un papel grandi den historia, como e prome organizacion na Washington DC dedica na e inclusion di Mericanonan Caribense den e proceso di tuma decision na Merca, y e desaroyo economico di e region di Caribe. Como tal, ICS ta fungi hopi biaha como intermediario entre Gobierno Mericano, agencianan y comunidnan Caribense na Merca y gobiernonan den Caribe mes. E organizacion

ta traha cu organizacionnan Mericano y tambe den Caribe, manera e National Medical Association, National Minority Suppliers Development Council, the NAACP, the Caribbean American Chamber of Commerce and Industry, National Education Association, Global Rights Law Group, World Bank/IMF Caribbean Staff Association, Caribbean Research Center, y Caribbean Policy Development Center pa logra su obhetivonan. Un di nan ta pa traha brugnan entre e comunidad Caribense y e poblacion general na Merca. Hunto cu partnernan y Gobierno Mericano a percura cu ICS a bira e organizacion Caribense principal na e capital Mericano. Actividadnan di ICS ta inclui tayer, seminario, symposium y conferencianan. Asina a logra formula e resolucion na 570 pa Congreso Mericano pa declara Juni e 'National Caribbean American Heritage Month,' ademas di a promove dialogo entre lidernan Caribense y Banco Mundial y IMF.

Segun ICS, e diversidad di hende na Merca a contribui na fortificacion di e comunidad Mericano, y inmigrantenan di Caribe sigur a hunga un papel

grandi, for di John Russworm, e prome editor di corant di colote na Al Roker, conoci pa su trabou na NBC. Otro figura importante pa Merca, esta Malcolm X, e activista civil fayeci, tambe tabata di descendencia Caribense. Mirando e impacto di personanan di Caribe den e sociedad Mericano, ICS a dicide pa crea na 1994, e Caribbean American Heritage Award pa reconoce esnan cu a duna un contribucion impresionante na sociedad Mericano, alabes

promocionando cultural y interes Caribense na Merca. Dr. Edward Cheung, cu su logronan cu Hubble telescope ta un ehempel di un persona di Cariba cu a resalta pa su contribucion na Merca y pa e



Sra. Brigitte De Meza y Dr. Edward Cheung

comunidad Caribense. Tabata otro Arubiano reconoci, Maureen Bunyan, kende a nomina Dr. Cheung pa e premio prestigioso aki. Bunyan tambe a haya e premio grandi aki den pasado. Otro

nominadonan e aña aki ta David Boyer di Haiti, Wyane Frederick, MD di Trinidad & Tobago, Dr. Roy Hastick di Granada y Honorabel Marie St. Fleur di Haiti.